

1463

*Tergeſtino-
rum cona-
tus.*

tu fuere, discordia inter Justinopolitanos & Tergeſtinos de vectigalibus & publicis viis orta : mox utrinque iræ poſt mutuas injurias eo uſque exarſere, ut Patres majorem belli molem animo agitantes, in hanc quoque partem Rei-publicæ coacti ſint imperii vires intendere. Sed res ipſa ut facilior ſit cognitu, aliquanto altius eſt repetenda. Conſueverant Germani negotiatores quinque paſſuum millia a Tergeſti mœnibus recta Juſtinopolim & alias Hiſtriæ urbes frequentare : quorum commercia, quum nihil ad ſuum uſum attinere Tergeſtini cernerent, ferrentque id indigne, a Fœderico Imperatore, in cujus fide erant, per legatos poſtulant, ut omnes Germani nominis negotiatores qui in Hiſtriam tranſirent, per Tergeſtinam urbem iter facere juberentur, rati quod erat, fore ut brevi civitas mercatorum frequentia fieret totius Hiſtriæ emporium : tum vero (quia Fœdericus illorum poſtulata non omnino rejecerat) negotiatores a veteri curſu in ſuam urbem hoſpitali benignitate, aut ſi alia ratione non poterant, vi avertere cœperunt. Id Juſtinopolitani indigne ferentes, ad Principem & Senatum mittunt, qui de Tergeſtinorum injuria queſti, docerent omne Hiſtricum nomen magno incommodo nova illa vicinorum insolentia affectum iri. Ea querela Patres commoti, jubent navigia aliquot circa Tergeſti littora inſtructa ſtationem habere, ac diligenter proſpicere, ne quid commeatus mari in oppidum conveheretur. Quod ipſum quum æquo animo Tergeſtini latuſi viderentur, conſtanterque incommodum diſſimularent, placuit, præſidio opportunis locis diſpoſito, a continentis ora præſentem ulciſci injuriam. Sanctes Gavardus, Juſtinopolitanus, cum aliquot equitibus miſſus eſt : qui illorum finibus, impetrato ad id a Goriciano Comite loco, inſeſſis, negotiatores ad priſtinum iter frequentandum hortaretur : quos ſi, ut prius, a ſuo curſu Tergeſtini vi avertere conarentur, rem armis vindicaret. Ita igitur accidit, ut ex equitibus qui cum negotiatoribus miſſi erant, unus, reliquis pulſis, ſubito Tergeſtinorum incurſu ſit cæſus. Ad quam novam injuriam Gavardus excitus, cum Hiſtrianorum manu omnem Tergeſti-